

Katekeze ba labarik

ENKONTRU I : HUSI REITOR-MOR NIA STREIA 2021

Tema : LAO HO ESPERANSA : “ HARE HAU HAFOUN BUAT HOTU” (AP 21:5)

Objetivo : Tulun labarik sira hatene hateke ba moris loron-loron nian ho esperansa.

Orasaun :

Nai Jesus, hahu ho loron foun ida, ami hakarak husu Ita, haraik mai ami esperansa. Aumenta ami nia esperansa. Hakbiit ami nia esperansa, liu-liu ba hirak ne'ebe lakon esperansa iha sira nia moris; ba hirak ne'ebe moras, terus, hela mesak ne'ebe laiha ema atu tau matan. Jesus, Ita mak esperansa nia hun, haraik mai ami no ba ema hotu grasa fortaleza no esperansa lolos nian. Hodi Kristu ami Nai. Amen.

Istoria : *“O-nia Sapatu ne'e halo ha'u koko lalehan iha rai”.*

Iha labarik na'in rua, feto naran Tety no mane naran Dany, Tety oan ki'ak. husi kiik kedan nia aman mate hela nia mama de'it ne'ebe iha matan sorin a'at. Nia hakarak tebes atu eskola. maibe nia sapatu laiha loroloron tanis. Dany kiak ba inan, ninia papa pension ona. Nia iha de'it sapatu ida de'it. Tan Dany haree Tety tanis iha Estrada ninin nune'e Dany husu nia: Tety nusa mak tanis beibeik? Tety dehan: Ha'u hakarak tebes ba eskola maibe ha'u labele tama iha aula tan professor nafatin duni sai ha'u tan sapatu laiha. Dany hanoin tebes Tety, no dehan ba nia: Tety lalika hanoin barak o eskola lokraik to? Ha'u eskola dader no sai tuku 12.00. o fali tama tuku 1.00 loos? Dader ha'u ba eskola too tuku 12.00 wainhira ha'u sai, ha'u hakas an halai maka'as no o ba hein iha dalan , para hatais fali ha'u-nia sapatu, ba eskola no ha'u fila mai ho ain tanan laiha problema. Maibe o kuidadu de'it tan sapatu mak ne'e de'it. Tety agradece Dany. Nune'e loroloron sira hatais sapatu ida ne'e ba eskola to'o tinan 4 nia laran, wainhira tama iha sestu ano (kls VI), wainhira Dany fila husi eskola, udan boot, mota tun , maibe Dany hakas an halai maka'as atu Tety labale tarde iha eskola, derepente mota tun, Dany monu no mota lori tiha sapatu sorin. Dany husi dook de'it nia tanis ona, tan hanoin Tety tan nia labele ba eskola ona. Tety ho matan been dehan ba Dany, lalika triste, Dany, sapatu mak lakon iha mota, maibe o-nia domin ba ha'u lalakon. Sapatu sorin ne'ebe hela fo sasin ba o-nia domin ba ha'u. O-nia fuan osan mean, o-nia karidade hatudu mai ha'u katak Maromak-Nia Reinu iha tiha ona iha ita leet.

4. Pergunta atu haklean istoria

1. Istoria ne'e dehan saida ba o / imi?
2. Labarik sira ema ki'ak ka ema riku?
3. Dany hatudu hahalok sa ba Tety?
4. Wainhira Dany lakon tiha sapatu sorin no triste tebes tanba nia labele tulun tan Tety. No Tety dehan saida ba nia?

EVANGELHO/LEITURA : ROMA 5:1-11

“ESPERANSA”

Ne'e duni tan ita sai ema los ona tan fiar, ita dame malu ona ho Maromak husi ita nia fiar iha ita Nai, Jesus Kristu. Husi Nia ita bele too tan fiar ba kmanek ne'ebe ita hela ohin, no ita bele gaba-an iha esperansa Maromak nia gloria nian. Laos ida ne'e deit, maibe ita bele gaba-an mos iha ita

nia terus laran, hodi hatene katak terus ne'e halo ita maka'as atu tahan, no ita nia laran maka'as halo ita sai ema ne'ebe ukun-an, no ita nia ukun-an lori ita ba esperansa; no esperansa halo ita laran la nakraik, basa Maromak nia domin fakar tiha ba ita nia fuan husi Espiritu Santu ne'ebe ita simu ona. Basa Kristu wainhira ita sei kbiit laek, mate iha tempu lolos atu soi ema fiar laek sira. Tebes duni susar ba ema atu saran-an ba mate tan ema diak ida. Maski tan ema diak ida ema bele hetan aten brani atu mate. Maibe Maromak hatudu Nia domin ba ita iha ne'e: katak, wainhira ita ema maksalak, kristu mate tan ita. Ne'e duni tan ita ema los ona husi Nia ran, Nia sei soi ita liu tan husi hirus boot. Tebes wainhira ita sei funubalun ba malu, ita hadame malu ona karik ho Maromak husi Nia oan Mane nia mate, ohin liu tan, ita sei hetan Maksoin husi Nia moris. Laos deit ida ne'e; maibe ita sei gaba-an kona ba Maromak husi ita Nai, Jesus Kristu, basa, husi Nia oras ne'e ita dame malu ona.

Pergunta atu haklean leitura

1. Leitura koalia kona ba saida?
2. Se mak ita nia esperansa lolos?
3. Ba imi esperansa mak saida?
4.

Rezumu

Ita nia tema ohin ne'e koalia kona ba "esperansa". Iha istoria ne'ebe ohin ita rona oinsa Dany no Tety fo esperansa ba malu, Dany ho laran luak ajuda Tety atu bele eskola hodi oferese nia sapatu ba Tety durante tinan 4 nia laran sira rua troka malu sapatu atu bele ba eskola. Liu husi sao paulo nia carta ne'ebe ohin ita rona kona ba esperansa katak ita nia esperansa mak iha Maromak deit tan Nia fo Nia Oan Mane no hodi Nia Oan Mane nia mate ita hetan Maksoin husi Nia moris hias; Rector Mor salesiano ne'ebe sai nu'udar Don Bosco nia susesor, iha ninia streia 2021 nian mos hatoo mai ita ninia mensagen furak kona ba esperansa. Ho realidade ne'ebe ohin loron mundu hasoru kauza husi moras pandemia covid-19 nian halo ema sai individualismo; ida-idak hanoin nia-an, ida-idak hadook-an husi ida seluk, labele hasoru malu, labele halimar hamutuk, moris sai nakdoko, trankadu. ita hanoin katak ita rasik bele hetan solusaun hanesan ne'e?

Husi parte seluk, ita nu'udar labarik no sarani bolu ita atu oinsa ita hatudu Maromak nia domin ba ita nia maun alin sira. Liu husi hahalok simples mak hanesan : la baku malu, la koalia lia aat ba malu, badinas estuda no ba eskola, respeita inan aman, halo buat kiik sira ne'e atu bele hafoun buat ruma iha ita nia moris, no iha ita nia sosiedade. Tan ne'e Mai ita haka'as-an atu sai labarik ne'ebe diak liu tan iha ita nia moris loron-loron nian.

Empeñu : animadores hamutuk ho labarik oratoriano sira hanoin kona ba empenu ruma atu halo iha semana nee nia laran.

Ezemplu : hili orasaun ruma atu reza ba ema moras covid ka visita ema/kolega ruma ne'ebe lakon ona esperansa tan nia mama ka papa mate, hela ho ema seluk ka kolega ne'ebe nunka ba misa ou seluk tan.

Orasaun final : reza hamutuk / kanta hamutuk orasaun Ami Aman